
“ФАРҒОНАНИНГ ТАДБИРКОРИ – ФАРҒОНАНИНГ ИСЛОҲОТЧИСИ” ТАШАББУСИ АМАЛДА

Сўнги 3 йилда тадбиркорлик фаолияти эркинлигининг кафолатлари ва уларнинг фаолияти самарадорлигини ошириш бўйича салмоқли ишлар амалга оширилди. Бу эса ўз навбатида ушбу соҳанинг ривожланишига янада кенг имконият яратди. Соҳада олиб борилаётган ислохотларнинг мантиқий давоми сифатида давлат раҳбари томонидан илгари сурилган “Тадбиркор-ислохотчи” тамойили остида тадбиркорлик субъектлари билан таъсирчан ишлашнинг доимий тизими яратилди.

Ҳукумат томонидан ишлаб чиқилган ушбу тамойил бўйича ишлашнинг доимий тизимини ташкил этиш тўғрисидаги амалий чора-тадбирлар режаси доирасида туманимизда ҳам тизимли ишлар олиб борилмоқда.

Жумладан, тадбиркорлик ташаббусларини қўллаб-қувватлаш соҳасидаги корхоналар фаолиятида юзага келаётган, кредит, ер ва бино ажратиш, инфратузилмаларга уланиш, солиқ ва божхона имтиёзларидан фойдаланиш каби юзага келаётган мавжуд масалалар тумандаги 4 та сектор раҳбарлари томонидан аниқланиб, уларни ҳал этиш чоралари кўрилмоқда.

Бундан ташқари, 2020 йилги ҳудудий инвестиция дастуридаги лойиҳаларни ишга тушириш ҳисобига туманда 2202 та ёрдамга муҳтож ва камбағал оилалар аъзоларини ишга жойлаштириш бўйича зарурий чоралар кўрилмоқда. Шунингдек, тадбиркорлик субъектларининг ҳуқуқлари ва қонуний манфаатларини ҳимоя қилишда соҳа мутахассислари, масъул идора ва ташкилотлар раҳбарлари билан тўғридан-тўғри алоқа ўрнатган ҳолда уларнинг фаолиятида юзага келаётган мавжуд муаммоли масалалар аниқланиб, уларни ҳал этишда кўмаклашилмоқда.

“Фарғонанинг тадбиркори – Фарғонанинг ислохотчиси” ғоясининг мазмун-моҳиятини кенг тарғиб этиш мақсадида, туманда ишлаб чиқарилаётган экспортбоб маҳсулотлар ҳамда амалга оширилаётган йирик лойиҳаларга жалб этилаётган инвестициялар тўғрисидаги маълумотлар телевидение ва телеграмм каналларида бериб борилмоқда.

Шу ўринда мисолларга мурожаат қилсак. 2017 йилнинг 25 июлида Навбахор МФЙ ҳудудида тадбиркор Эркинжон Гафаров томонидан ташкил қилинган “Риштон Бройлер” МЧЖнинг жами лойиҳа қиймати 40,0 млрд сўмлик бўлиб, шундан 2472 минг АҚШ доллари хорижий кредит линиялари ва 19,4 млрд сўми ўз маблағлари ҳисобидан “Паррандачилик хўжалигини ташкил этиш (тухум ва парранда гўшти)” лойиҳаси амалга оширилиши белгиланган. 2019 йилда корхона Германиядан ускуналар, Венгриядан 70,2 минг бош бройлер жўжаларни сотиб олди. Лойиҳани амалга ошириш натижасида 20 га яқин янги иш ўринлари яратилди. Ҳозирги кунда МЧЖда 105,0 минг бош насли бройлер жўжалари парвариш қилиб келинмоқда.

Туманинг Фаровонлик МФЙ ҳудудида 2018 йил 5 июлда тадбиркор Мадинахон Солиева томонидан ташкил этилган “Сервис Мед” МЧЖ 2019 йилда лойиҳа қиймати 5,0 млрд сўм, шундан, 173,0 минг АҚШ долларлик хорижий кредит линиялари, 3,0 млрд сўм ўз маблағлари ҳисобидан “Тиббий хизмат кўрсатиш фаолиятини ташкил этиш” лойиҳаси амалга оширилди ва бунинг ҳисобига 12 та янги иш ўринлари яратилди. Ҳозирги кунда мазкур МЧЖда “Узи”, “Рентген”, ЭКГ, ЭЭГ аппаратлари, терапевт, гинеколог, кардиолог, стоматолог, окулист, невропатолог, лор, ФГДС мутахассислари ва лабораториялари хизмат кўрсатиб келмоқда.

Бундан ташқари, туманда ишлаб чиқарилаётган экспортбоб маҳсулотлар тўғрисидаги маълумотлар, туманинг инвестициявий жозибадорлигини акс эттирувчи электрон ва босма каталоглар тайёрланиб, вилоят ҳокимлиги ва вилоят делегациясининг хорижий давлатларга бўлаётган сафарлари давомида ушбу нашр ва тўпламлар тақдимоти бўлиб ўтмоқда.

Исломжон МАДАМИНОВ,

туман ҳокимининг ўринбосари, Инвестициялар ва ташқи савдо бўлими бошлиғи.

“Риштон ҳақиқати” газетасидан олинди